

MBON UKO KE SPIRIT

Mme Hebrew 11:23-40.

QYQHỌ UKPEP-ŃKPỌ 443

Eke Mkparawa

IKỌ IBUOT: “Koro afo eyenam mi mbumere udim-ekọñ: Abasi mi onyũ anam mi mfrọ ñkaña ibibene” (Psalm 18:29).

Idaha Moses Ke Mbuk Eset

ISRAEL ekedi idut emi ekedude ke ufin ke ini emi Moses akamanade. Edidem ama ọno uyo ete ewot kpukpru nsek nditọ iren, edi ete ye eka Moses ema enyene mbuotidem ke Abasi enyũ enim ke akpanikọ ete Abasi oyom Moses odu uwem; ke ntre eka esie ama odip enye ke akpasa ke idak nyanyaña. Adiaha edidem ama okut enye onyũ ada enye enyene nte eyen esie. Enye ama aka iso ọkọri ke okure edidem onyũ ọbọ ukpep-ńkpọ ke kpukpru ifiok nditọ Egypt.

Ke ini enye ama okokpon, Abasi ama etiñ ke esit esie abaña itie ifin emi nditọ Israel ekedude. Enye ama ọfiok abaña nte mmọ ekenamde ọkpọsọñ utom ke ndinam mme ọrikori (brick), ndien enye ama oyom ndiñwam mmọ. Enye ama onyime ndikpọñ mme inemesit ufok Pharaoh koro enye ọkọfiokde ete ke uwem emi edi ata ibio-ibio, ndien edi ndibeñe idem mbaña Heaven. Ke mbuotidem enye ama ọfiok abaña uduak edifak owo, oro edi ke Jesus eyedikpa man afak mme anam idiok onyũ ebeñe mmọ idem ọnọ Heaven. Oro ekeneñere oyom mbuotidem, koro Moses ama odu ke ńkpọ nte isua 1,500 mbemiso Jesus amana. Uduak edifak owo emi Abasi okowutde Moses ama otim edi akpan ńkpọ ọnọ enye akan ndidia inemesit idiok-ńkpọ ke “ekpri ini.”

Idorenyin Heaven

Ekọm urua kiet ekededi ikponke ikan nnyin ndikpe man inyene Heaven nte iduñ nnyin. Ekpededi nnyin inyeneke baba ńkpọ ndomo kiet ndidara mbaña ke ererimbot emi, edieke nnyin minyeneke ufok idem nnyin, inyũ inyeneke obufa moto, edieke owo mimaha se nnyin inamde, edi edieke nnyin idude uwem eke enemde Abasi esit inyũ ika Heaven ke akpatre, oro eyekpon akan kpukpru ńkpọ.

Moses akpakana nte enyene inyene ye odudu nte edidem Egypt, edi utu ke oro, enye ama onyime ndiñwam mmọ emi mikamaha enye man oto do enye aka Heaven. Akada akwa mbuotidem ndida million owo ita usuñ nduk ke akai-ikot ke ini enye mikenyleneke usuñ nte edinode mmọ udia. Edi Abasi ama ọdọhọ enye etiñ ọnọ Pharaoh, “Sana ikot mi yak,” ndien Moses ikefeheke ndik ibaña Pharaoh. Pharaoh akpakana nte owot enye ke ntak ndinam mme ifin esie esọñ ibuat ye ukara, edi Moses ama onim ke akpanikọ ete ke Abasi eyekpeme imọ, Abasi ama onyũ anam ntre.

Sia Moses ekenyenede mbuotidem, Abasi ama abahare Ididuot Inyãñ man Nditọ Israel esaña ebe ke edisat isọñ. Ke ini mbon ekọñ Egypt ekedomode ndisaña mbe, kpukpru mmọ ema ekpaña ke mmọñ. Mmọ ikenimke Abasi ke akpanikọ.

Eyen-erọñ Passover

Abasi ama owuk Nditọ Israel ete enim saña-saña usọrọ emi ekekotde Passover. Ufok kiet kiet ekenyene ndiwot eyen-erọñ emi ọfonde ama enyũ esime iyip ke enyin-usuñ ufok mmọ, enyũ eta eyen-erọñ oro ye ndot-ndot ikọñ ye uyo eke leaven miduhe. Iyip oro akada ọno Iyip Jesus emi ediduokde ke mme isua ke iso; ndien kpukpru owo emi ekedude ke mme ufok emi ekesimede iyip ke enyin usuñ mmọ ke okoneyo oro, ema edu uwem, ke ini ekewotde kpukpru akpan ke ufok nditọ Egypt. Oro ñko okoto mbuotidem: man enim ete ke iyip ufene emi esimede ke enyin-usuñ mmọ ekeme ndinim mme akpan mmọ uwem. Edi adaña owo nte ekekopde uyo ema ebọ edidiọñ enyũ edu uwem; edi mmọ emi eketutde utọñ ema ekpaña.

Ke isua aba emi Nditọ Israel ekesañade ke akai-ikot Abasi ama ọnọ kpukpru mmọ udia; ndien ọfọñ mmọ ikonyũ iwahake ye ikpa-ukot mmọ ñko, ke kpukpru isañ emi mmọ ekesañade! Edi ke ediwak ini mme ńkpọ ema esitibe ke ini mme owo mikonimke Abasi ke akpanikọ, ndien mmọ ekpaña. Oro ekedi ufen mmọ.

Ñwure Jericho

Ke akpatre, ke isua aba toño nte mmọ ekeworo ke Egypt, idut Israel etoño ndibe nduk ke Canaan. Jericho ekedi akpa obio emi mmọ ekenyenede ndikan. Abasi okoro mmọ esen-esen usuñ ndida ñkan obio oro. Enye ama odoho mmọ esaña ekanare ibibene obio oro ke usen itiaba, ndien ke oyoho usen itiaba yak mmọ esaña ekanare utim ikatiaba. Mme oku ekebem iso ke isañ oro, ebiom Ekebe Ediom. Ke ini mmọ edifride ukorowo mme owo ekenyene ndifiori mkpo, ndien ibibene eyedu. Mmọ ema enim Abasi ke akpaniko, ndien ibibene ema eduo ukem nte Joshua okodohode. Mmọ ekedi mme ñkoñ-ñkoñ ibibene emi eketimde ebọ man akpan mme asua ndibe nduk. Mmọ ema ekpeme mme andidun Jericho tutu osim ini emi, edi idahemi oto mbuotidem ibibene Jericho owure. Ema ewot kpukpru mme andidun obio ibohoke Rahab ye mbon ufok esie, emi ekedipde mbon uyep Israel.

Mbuotidem Gideon

Ke ini, ke ini, mme owo ema edu emi ekenimde Abasi ke akpaniko enyū ebode eridiō esie. Ete Gideon okokpono ndem, edi Gideon ama enyene mbuotidem ye Abasi ndien enye ama abiat mme ndem ete esie. Ke akade iso, enye ama ada mbon ekōn aka akañwana ye mbon Midian ye Amelek. Abasi ama etiñ oño enye ete ke mbon esit ndik ema edu ke udim ekōn esie, yak enye anam mmọ efiak enyoño ufok. Owo tosin edip ye iba ema efiak enyoño! Ekeme ndidi ke akpa ifet Gideon ikekereke ete ke imọ imenyene owo ewak, edi idahemi mbahade iba ke otu itie ita efiak! Edi Gideon ama onim ke akpaniko ete ke Abasi eyenọ imọ edikan. Ekem Abasi etiñ oño Gideon ete oño mbon ekōn esie udomo efen, ndien owo ikie ita kpọt ekesuhọ ndiñwana ekōn nno Gideon, edi mmọ ikenyeneke baba ñkpọ ekōn kiet! Edi Gideon ama onim Abasi ke akpaniko; ndien ke mbon ekōn esie ekenamde nte eketemede mmọ, Abasi ama anam mmọ eñwana ekan kpukpru mme idut emi ekedide ndiñwana ye mmọ.

Barak, Samson ye Jephthah ekedi mme ada-usuñ efen ke Israel ke ini mme ebierikpe, emi ekenamde mkposon ñkpọ; edi ye Abasi, ñkpọ baba kiet isonke. Oto mbuotidem mmọ ema ekan mme asua.

Edidem Ekpemerōn

David ama akabare edi akwa edidem emi akananam Israel mikenyeneke. Ema eyet enye aran enim ndidi edidem ke adaña emi enye okosuk edide eyen-owon; ndien akana nte enye ebet ke isua duop mbemiso ayak ebekpo Israel enọ enye. Ke mme isua oro, Edidem Saul ama odomo ndiwot enye ke ediwak ini, edi David ama onim ete ke Abasi eyenyaña imọ ndien Abasi ama onyū anam ntre.

Ke ini David okosuk edide kaña ekpri eyen-eren ekpemerōn, Abasi ama oño enye ukeme ndiwot bear ini kiet ye lion ini efen ke ini mmọ ekeyomde ndimum erōn esie. Nko ke ini Israel ekeñwanade ekōn ye mme Philistine, ndien baba owo kiet ikoduhe emi ekenyenede uko ndiworo ñkañwana ye Goliath, aňyan owo Philistine, David ama ada ñkpọ utop itiat esie oworo aka ndisobo ye akwa owo ekōn emi. Enye okodoho Goliath ete: “Afo ada ofut, ye eduat, ye onyim etiene mi: edi ami nda enyiñ Jehovah mme udim, Abasi mbon-ekōn Israel, emi afo esinde ke ndek, ntiene fi. Mfin emi Jehovah eyeda fi esin mi ke ubok; ndien nyewot fi, nnyūn mbigi fi ibuoť” (1 Samuel 17:45, 46). David ikenyeneke ofut, edi ke ini enye ama okotop itiat ini kiet oť Goliath ndien enye oduo ke ison, enye ama ada ofut Goliath esibe ibuoť esie. David ewet ediwak mme Psalm emi nnyin inyenede ke Nwed Abasi, oťoro Abasi ke mkposon ufak Esie. Abasi akanam emi oño David koro enye okonimde Abasi ke akpaniko.

Mmọ Efen Emi Ekenimde Abasi Ke Akpaniko

Nditọ Hebrew ita ke obube ikañ ekedi ndusuk mmọ emi “ekenimede ide ikañ.” Daniel ekedi enye emi Abasi okokibide mme lion inua oño. Elijah ye Elisha ekedi mme anditiñ ntiñ-nnim ikọ emi ekenyenede mbuotidem ke Abasi tutu mmọ enam mmọ emi ema ekekpa etoño ntak edu uwem. Mbio efen ema enim Abasi ke akpaniko okposuk edi nte mikosioho mmọ ifep ke mfina mmọ; mmọ ema enyime ndikut ukut nnyūn mkpa utu ke mmọ ndiyik Abasi nnyūn nnam ñkpọ eke minemke Enye esit. Mmọ efen ekut idomo oto “nsahi ye ufen ye ñkpokobi ye ufok-ñkpokobi ñko; etoño mmọ ke itiat, eyok mmọ esibe mbio iba, edomo mmọ, ewot mmọ ke ofut: mmọ oro esine ikpa-erōn ye ikpa-ebot eduyo; mmọ enana ñkpọ, ekut ukut, ebọ ndutuhọ” (Mme Hebrew 11:36, 37). Mmọ ema enyime ndikut kpukpru ukut oro koro mmọ ekenimde Abasi ke akpaniko ete ke Enye enyene ebiet idun oño mmọ ke Heaven ke

ini mmọ edikpọnde ererimbot emi. Mmọ akananam ikwe Heaven, edi mmọ ema enyene mbuotidem ye Abasi.

Mme anditiene-Christ emi ekewotde mmọ ke ntak ikọ Abasi ke mme emana emi ebeye ke ekop nsinsi inemesit idahemi ye Jesus nnyin. Ediwak owo eyesuk ekaka iso eyak uwem mmọ enọ; edi ekprie ibio ini emi mmọ edikpọnde ererimbot emi, eyeberede uyai Heaven ọnọ mmọ, emi okpọnde akan mme nkpo ererimbot. Edieke akpanade nte nnyin ikpa ke abana mbuotidem nnyin, Jesus eyeda onyūn anyan ubok ndida nnyin ke ndo-ndo oro nnyin iduokde akpatre ibifik mi ke ererimbot. Do ndien nnyin iyedu ke nduok odudu ke nsinsi ye Ọbọn.

Paul adian udim ikọ kiet ke abana mbon uko ke mbuotidem. Enye okodohọ ete ke uduak edifak owo ikotimke iyohọ ke mmọ: nkpo odu emi ofonde akan emi enimde enọ nnyin. Nnyin iduñ ke eyo Edisana Spirit, ndien Iberedem ododuñ ye nnyin. Nnyin kiet kiet emi ibode erinyaña ukpọn ye edinam asana, enọ nnyin uyo ete ibọ uduok-mmọn Edisana Spirit. Nso oruk ifet ke nnyin inyene! Nnyin imekeme ndidi Nwan Ndo Christ edieke isanade ikekem nte ikọ Abasi etemede. Uduak edifak ikoyohoke tutu Jesus ọnọ Edisana Spirit ke usen Pentecost onyūn oyohọ ke idem mmọ emi ekedude ke Ubet Enyọn. Edi utom nnyin, nko onyūn edi ifet nnyin, ndibọ uduok-mmọn Edisana Spirit man ikeme nditim nnam nkpo nno Jesus nnyūn ndu ke mbeñe idem ke ini Enye edidide.

MME MBUME

- 1 Eka Moses akanam didie owut ete ke imọ imenyene mbuotidem?
- 2 Nso ke Moses ekemek akan enye ndiduñ ke okure edidem?
- 3 Nso ikotibe ke ison Egypt ke okoneyo oro Nditọ Israel ekeworode?
- 4 Ekekan didie Jericho?
- 5 Tiñ nkpo esisit baña uwem Gideon ye mme nkpo emi enye akanamde oto ke mbuotidem.
- 6 Anie ekedi ekpemeron emi akakabarede edi edidem? Tiñ mme ikpo nkpo uko emi enye akanamde.
- 7 Mme anie ke ekesin ke obube ikañ edi ikañ itaha mmọ?
- 8 Anie ke eketop esin man mme ekpe eta, edi nkpo ikanamke Enye?
- 9 Nso ikotibe inọ mmọ emi ekewotde mmọ ke ntak Christ?
- 10 Nso inam Uduak edifak owo oyohọ?